



**Oz cun las vuschs giuvnas**  
Breaking Walls Grischun e medusas ed odin. Maila cotschna e gimnastica ad Aarau. 10



**Natürlich aus dem Eichenfass**  
MOHL

# LA QUOTIDIANA

Redacziun: Via Sommerau 32, 7007 Cuirra, tel. 081 255 57 10, redacziun@laquotidiana.ch

## Ruosnas el sistem

■ (anr/ac) Aunc igl atun vargau ha il deputau *Tino Schneider* formulau ils avantatgs dalla votaziun electronica a caschun dad ina dieta a Glion. El ha giu explicau la sistematica dalla votaziun electronica e menziunau la pusseivladad da votantas e votants da verificar igl agen votum el sistem per impurtont mied dad impedir manipulaziuns vid la veglia politica da

votantas e votants. In'examinaziun dad experts dil sistem da votar da La Posta ha gest anflau en quella verificaziun munconzas da segirtad che porschan pusseivladads da falsificar la votaziun. Schneider ei trumpaus che l'introducziun dalla votaziun electronica ei sistida.

> PAGINA 5

## Tessanda cun nouva sporta

■ (anr/fa) Da l'on 1959 han las tessunzas e cusunzas da la Tessanda a Sta. Maria pudü far müdada in üna chasa d'immez cumün. Pel giubileum da 60 ons vain inaugura hoz qua üna localitè chi preschainta als interessats il tesser. Il giarsunadi da tessunza düra trais ons. Actualmaing sun in Svizra trais giarsunas chi imprendan il manster nomnä in tudais-ch «Gewebegestalterin». Üna da quellas,

üna giuvna da Claustra, fa il giarsunadi illa Tessanda a Sta. Maria. «No pudain tour mincha duos ons üna giarsuna», disch *Maya Repele* chi maina la gestiun da la Tessanda, «implü vegnan mincha on eir tuot las classes svizras da tessunza a Sta. Maria illa plü pitschna scoula industriala grischuna per far cuors in bloc.»

> PAGINA 11



Da l'on 1959 vaivan las tessunzas ed agüdants fat müdada cun tuot ils talers da lur Tessanda. FOTO HEIMATWERK

## 2019 – in onn sco auters er

■ (rtr) Il president da l'Uniu purila grischuna, *Thomas Roffler*, è fin qua cuntent cun la racolta da fain en il Grischun. En general sajan ils prads en Grischun er sa revegnids bain da l'onn da setgira 2018. La chalaria e setgira dal 2018 sentan ils purs era anc il 2019, almain regional.

Tenor *Thomas Roffler* sentian oravant tut il nord dal Grischun ed il Grischun central anc la setgira. Quai che manchia en questas regions saja il fain fin da qualitad, uschia saja la racolta en tscherts lieux pli pitschna.

In ulteriur punct ch'ha influenzà la racolta saja la vegetaziun ch'ha cumenzà quest onn cun retard pervia da la blera naiv. Gra-

zia a fitg bun'aura sur Tschuncaisma haja quai dentant gi be ina pitschna influenza. «Il 2019 è in onn sco nus enconuschain da blers auters onns», dil il president da l'Uniu purila grischuna *Thomas Roffler*.

Tut en tut è il president da l'Uniu purila grischuna cuntent cun la racolta 2019. Oravant tut cumpareglia cun l'onn passà.

### L'aura decida

*Thomas Roffler* spera che l'aura na fetschia betg da sturma il proxim temp. Optimal per l'agricultura fissi sch'i dess periodas da bell'aura durant il fanadur. Tge che na dastgia dentant er betg mancar saja la plievgia en intervals regulars.

DA HANS HUONDER / ANR

■ **Il juniors B dalla Surselva han contonschiu la gronda finamira, numnadamein la promoziun ella ligia da Coca Cola. D'atun spetgan fetg ferm adversaris sils juniors sursilvans.** La squadra ch'ha gudignau il campinadi dalla gruppa 1 da promoziun dils juniors B dall'Uniu da ballapei dalla Svizra orientala consista da giugadurs da differents clubs. Il giugadurs derivan da Mustér e Vrin entochen Schluein e Laax. Igl ei in mussament dalla buna collaboraziun, mo era dalla finamira comunabla dils clubs da ballapei: Il meglers giugadurs d'ina vegliadetgna en in'equipa. Il giugadurs ein loschs dil grond success contonschiu ed attribueschan quel a plirs facturs: Grondius spert d'equipa, harmonia, qualitad sin tuttas posiziuns e la voluntad da vuler gudignar mintga giug. Els ein denton era perscharts dalla gronda sfida che spetga sin els igl atun vegnent. Da spiarder dat ei denton nuot, gia la participaziun a quella ligia

## Success colligiaus cun gronda sfida

La squadra da ballapei dils juniors B dalla Surselva ha scret historia



Perseveronza e plascher dil ballapei han menau al success dils juniors B dalla Surselva. MAD

porscha als giuvenils la pusseivladad da far novas ed impurtontas experientschas. Grazia ad ina tenuta fetg positiva ei l'equipa cul trenader *Claudio Bundi* alla testa marschada la primavera d'ina

victoria a l'autra. In sulet da nov giugs ei vegniun spiar. Quei success, mo era la promoziun da Schluein Glion ella secunda ligia regionala e da Trun/Rabius ella tiarza ligia muossa ch'il ballapei

sursilvan ei il mument sin in bien nivel. Ins astga pia esser spangiaus gia ussa sin la proxima stagium.

> PAGINA 3

## Giacun Hasper Muoth e sogn Placi

■ (anr/sb) Dumengia proxima, ils 7 da fenadur vegn commemorau il patrums dalla claustra da Mustér sogn Placi e Sigisbert. Quei gi da fiasta cun perdanonza festiva ha ina lunga tradiziun e vegn schon festivaus dapi tschentaners. Ella historia dalla litteratura romontscha ha quei eveniment era svegliau interess, en special tier Giacun Hasper Muoth (1844–1906), il poet da Breil. En siu idil «Il Gioder» descriva Muoth sias impressiuns dalla fiasta, per part era cun in tun critic-ironic ch'ei remarca-bels per quei temps: «Sontgadats e paders e prers e pievel snueivel / Passan la via, descendan las pradas e muntan la spunda». La relaziun culla religiun ei tier il prenci-poet ambivalent ed ordvart complexa. Il Gioder, la persuna principala, observa quella fiasta desinteressaus e senza igl anim religius ch'ins spitgass forsa. Pli fetg eis il interessaus d'anflar ina spusa, tgei che semuossa ordvart difficil cun sias aultas pretensiuns...

> PAGINA 2

## Casa pervenda Ruschein

DAD AUGUSTIN BEELI / ANR

■ **Igl onn vargau ha la pleiv Rueun, Ruschein, Siat, Pigniu intradau la sanaziun complessiva dalla casa pervenda da Ruschein.** Igl ei la suletta che surve-scha ella pleiv aunc sco domicil digl augsegner, las casas a Rueun, Siat e Pigniu ein fittadas a famiglias

e buc a disposiziun pli alla pleiv. Sur Ignazi Pally ha habitau varga 30 onns en quella casa. Il baghetg da lenn en construcziun da travs ei situau gest sper via principala a Ruschein. Igl ei ina casa marcanta che dat en egl a tgi ch'arriva el vitg l'emprema gada. Da tschella vart dalla via entschiva il crest da Plontabuora culla baselgia parochiala

da sogn Gieri orasum. La casa pervenda da Ruschein fuvu defnida sco domicil digl augsegner dalla pleiv fusiunada. Strusch otg meins suenter ch'ins ha entschiet cullas lavurs ha la suprastonza dalla pleiv envidau parochianes e parochians da visitar la casa sanada.

> PAGINA 5



La casa pervenda a Ruschein. FOTO A. BEELI



50027



9 771424 749004

Servetsch d'abunents e da distribuziun: tel. 0844 226 226 mail: abo@somedia.ch